

原輯南嶽志廿六卷

第五冊

南嶽志卷六

平江李元度原輯衡山

王香余
歐陽謙校刊

祠廟

唐虞五載一巡狩柴望秩于山川爲壇塢爲廟塢不可得而詳矣後世禮嚴廟饗而嶽廟迄未知建自何年宋開寶初始詔嶽瀆各以縣令兼廟令然廟不始於宋蓋自秦漢以來有之矣明御史陳祚獨疏請築壇壝立廚庫而去廟去塑像廷議不從夫非謂有其舉之莫敢廢耶

南嶽廟在縣西北三十里唐書地理志衡山縣有南嶽衡山祠元和志廟在縣西三十里南嶽記漢書郊祀志云祀南嶽於灊山後

遂以瀾爲南嶽隋文帝復移於今所通志唐初建司天霍王廟開元十三年建南嶽眞君祠十五年廟火所司重修之宋祥符五年建後殿紹興二十五年廟火淳熙二年復火元至正八年長沙府尹劉光祖奉命重修明成化六年巡撫都御史吳琛出公帑大修嘉靖二十一年分守衡永道潘九齡勸捐修葺萬曆十年分守衡永道管大勳開復水道填接後龍

國朝順治五年廟火康熙四十四年巡撫趙申喬奉

敕修四十七年

御製碑文並

御書光輔紫宸永峙南維二扁額雍正十年巡撫趙宏恩奉

敕修

御書功宏育物扁額乾隆十六年巡撫楊錫紱奉

敕修

御書靈曜南雲扁額嘉慶九年邑紳劉盤捐修巡撫阿林保奏請
御書宅南標極扁額同治六年巡撫李瀚章籌款重修奏請

御書銓德鈞物扁額光緒五年巡撫李明墀籌款重修九年奏請

御書黃離永吉扁額

御製重修南嶽廟碑

康熙四十七年

南嶽爲天南巨鎮上應北斗玉衡亦名壽嶽主靈長於祿位縣福
祚於子孫載在星經由來尙已往歲專官致祭肅薦馨香復以廟

貌傾頽敕命修葺蠲吉歲事鳩工庀材不斂閭左之錢不廢公旬之役羣臣歡忭庶民子來經始於四十四年七月訖工於四十六年九月不三歲而落成棖桷一新金碧重煥於時億萬臣民以茲嶽爲主壽之山咸欲伸其愛戴之悃爲朕祝釐而督撫諸臣亦合辭籲請謂宜親頒文翰宣導輿情朕以萬邦爲懷踐阼以來殫思治理區畫周詳敬

天勤民不遑暇逸而於嶽瀆諸祀典禮必虔凡以洽神人和上下也維茲南嶽靈爽斯憑亦期與吾民共樂雍熙同登仁壽大四海從風之治固萬年有道之基是則朕斂時錫福之至願云爾爰書重修歲月以示崇德報功之意俾勒之貞珉昭諸億禩焉

雍正十年

上諭湖南巡撫趙宏恩奏稱南嶽爲皇上主壽之山昔年修建廟宇碑亭今歷年已久須重加修葺料估工費計銀八千四百餘兩請動公項興修恭祝皇上無疆之壽等語朕思皇天無親惟德是輔朕受

天眷命爲天下主一行事一舉念皆

上天

皇考之所照臨若身無失德自蒙

上天

皇考垂慈護佑益壽延齡若德行有虧居心行事獲罪於天天下億

萬臣民豈能代朕祈禱而寬其譴責乎朕御極以來無日不以此訓示天下臣民凡有奏請建壇誦經爲朕祝釐延壽者悉嚴諭停止至於山嶽江河之神爲地方捍患禦災錫福兆庶者則虔修祠廟潔誠展祀以伸報享之忱並非爲朕一身祈福也

上天

皇考實鑒此衷南嶽之

神佑我楚民朕心感激廟貌久未修理應照該撫所請敬謹舉行惟是趙宏恩陳奏之詞識見鄙陋不知朕心用頒此旨再行宣諭俾眾通共知之

元虞世魁重修南嶽廟記
皇元統一天下嶽鎮海瀆悉入職

每歲祝香遣使侑以金帛驛至祠下著爲恆典惟衡嶽分值軫
宿壽星所疆天子視四嶽獨重焉而廟在赤帝峰下其制亦擬
帝者之居列聖尊敬有加式克至於今日至正八年戊子六月
上以靈區祠宇更風雨霜暑木腐瓦毀庭寢門廡朽久易倣特
降玉音委官相視廟宇損壞之處從新修理命下有司欽奉旣
而恐干禁忌輟之又二年竟成厥事湖南道長沙守臣劉光祖
祇承上意商材度工俾各屬州邑均齊物役分派湘潭州修理
正委本州同知阿兒思蘭忠顯董其事衡山縣給夫役而蘭侯
奉命唯謹卽日抵嶽敬共廟制於是徵匠僦工並手偕作柱蠹
更之橈朽易之飾陋以文充腐以新乃更其正殿西二楹井口

大櫨一東西櫨前小櫨二東邊後井口抹角櫨一西二櫨脊櫨
一上下檐西角丁檐四圍及殿後正井上下飛檐與夫梁椽節
稅釘角磚瓦修葺添換靡不一新孜孜奉公悉無民擾勤哉蘭
侯之究心經始於是年六月一日甲申七月告成猗與嶽祠之
靈永福邦國今聖天子尊崇祀典整飭祠宇以肅馨香以聳具
瞻誠國家之先務也而蘭侯慎其規畫竭其心膂不日而成俾
廟貌一新原於羣侯劉公舉當其任相成茲役有永無斁是不
可不書石以記美云

明商輅重修南嶽廟記南嶽衡山其高與泰華嵩恆相埒當星
紀之次熒惑之位實南方巨鎮自虞帝巡狩朝諸侯於此舉望

祭之禮秩視三公於是南嶽祠祀著爲彝典歷代因之至唐封以王爵宋復易以帝號瀆禮甚矣我太祖高皇帝法古爲治謂神靈莫測豈國家封號可加凡嶽鎮海瀆宜以本名稱之故於此山直書曰南嶽衡山之神而安神之祠則擬帝居賜以金盒一於春秋祀享之日奉香以奠歲久祠宇頽敝正統壬戌藩臬二司檄衡州長沙二郡修建其高弗及舊五尺忽風雷交作白晝晦冥至霽視其柱去基所半里官民畏悚謝過復崇制如初然物不能終壯久而復圯勢所必至前巡撫僉都御史西川王儉副都御史豫章羅篴屢欲修葺而以邊方弗靖未果已而知府樂平鄭冕給事中郡人劉昊相繼請於朝雖部符報可未有

能任之者成化庚寅秋巡撫僉都御史繁昌吳琛行縣祇謁廟下顧瞻徘徊慨然以建修爲已責於時參政稷亭甯英僉事雲間郁文博在行承命率衡州知府黃巖徐孚至廟計度資費因叩神從違乃得吉卜敬以白於巡撫遂相與定議出公帑白金二千五百餘兩命衡州衛指揮同知王綱往市川江巨木得四百五十章以爲棟梁之用餘材悉取諸近處工則僦江右之善者力則借倩衡湘諸縣附嶽之民時總戎李都督震聞之亦以白金三百兩來助餘皆知府徐孚從便區畫弗勞而辦仍命指揮王綱董其事而以素諳繕修謹愿僧人智能總匠役設計工價直驗力給餉葢勞者勞之而怠者自警物無妄費而功用速成

經始於辛卯春三月至明年冬十二月訖事落成之數正殿九間高七丈二尺象七十二峰後殿五間東西廊房九十六間嘉應門三座中御香亭御碑亭祭碑亭各一西廊後神祠一東廊後宰牲房神庫各一次爲正南門周圍崇垣四角有樓外爲櫺星門飾以丹漆施以綵繪深邃崇嚴宏敞壯麗山嶽實爲增重工興之二歲風雨以時秔稌充牣民食用足咸以爲神功所致是役也巡撫倡之總戎助之藩臬協贊之府衛奉行之人不告勞而功倍於昔僉謂盛美不可無述於是左布政使杜銘以書來徵文竊惟國之大事在祀而五嶽又祀典所先者方今聖皇御極事神治民誠通於天屢詔有司停不急之務罷無名之費

而於祀典獨加之意蓋謂祀神爲治民之本使祠廟弗葺曷以
妥英靈而致民福茲諸君祇承德意建此偉績自是對越無愧
福澤有永其爲政化之助豈淺尠哉敬用述其始末俾刻諸貞
石以示永久而復系以詩曰巍巍衡嶽封表自禹配德離明奠
位南土秩祀三公祀禮攸舉彝典昭然溢號斯去載經載營聿
新祠宇深邃崇嚴度越前古惟君敬神惟臣奉主惟民效勤惟
神錫祐歲序和平蠻夷率附田穀豐穰吏民安堵皇明萬年永
昌允祚於赫神功厥施茲普

〔明〕劉敞重修南嶽廟記南嶽山神廟自成化庚寅歲上請鼎建
至嘉靖壬寅歷七十年傾倒久無後寢前門兩廊圯亦殆盡正

殿穿漏階庭鞠爲草莽分守藩司少參甯夏潘公九齡行部謁
嶽慨朝廷禋祀之所蕪穢不治守臣責也集議重修官帑告乏
因勸諭編氓有饒貲仗義願助修理者聽貧不欲者弗強一時
風動相率書名得銀一千七百餘兩預請巡撫嘉興陸公杰上
虞車公純巡按侍御開州史公褒善上饒程公榮暨方伯餘姚
顧公遂各批紙牘乃易買王府估賣舊房七十餘間專委郡別
駕鄞縣楊君美冕董其事楊舉千戶文純衡山縣典史涂鏡分
勞督運裁斲舊木間以新材修完東廊四十八間西廊三十五
間葢正殿易其朽柱重施繪采以舊府蟠龍復御香亭豎寢殿
八柱未竟楊以陞去適副憲嘉興金公燦奉璽書飭兵重委別

駕馬平王君道繼楊董理王舉千戶張勳偕文雄共事修完嘉應二門中五間東西旁門各五間補完西廊十三間寢殿五間前建鐘樓碑亭復四角樓繚以周垣葺嘉應二門中五間旁鑿石爲兩闕門未竟王亦陞去適副憲福州陳公士賢奉璽書飭兵重委別駕陽朔王君琯續理凡諸未備未竟者於是大宗廟制一新矣先是嶽廟經始少參潘公有捧表入賀之行重顧敝廬謂嶽廟之修有司更代不常率煩調護以迄於成且浼爲記以告嗣修公歸載轉臬司副憲又三致意予惟衡山奠南服並嵩岱華恆稱五嶽與天地相終始祀典由來舊矣其見於經舜居攝南巡至南嶽如岱禮言祀觀之禮如岱也禹受禪若帝之

初茲山之祀可推周制六年王時巡諸侯朝於方嶽當時嶽有明堂爲享帝尊親之所禮特隆焉歷漢而唐報祀不衰觀文公粉牆丹柱之詩廟制爲備宋大興宮觀往往典以名儒閱范至能駢鸞記輝煥尤盛我太祖高皇帝汎掃其陋首詔嶽瀆稱本號一正千古之謬禮酌於經百七十年惟嶽之神鳩靈毓瑞以環衛北極興雲霈澤以溥福南人冥德陰惠固宜崇嚴祠宇以報其成矣

明管大勳開復水道填接後龍記大江以南崇岡絕巘奔翔磅礴雲矗星拱引七澤注巨湖峯然而蒼翠者蓋千萬數而衡山爲之宗衡山綿亘迴複拔地萬丈峻若祝融挺若天柱奇若芙

蓉峭屹若紫蓋又幾百數而朱明峰負其秀故峰之下平曠夷
 衍可數十里而嶽神祠焉莫炎維領南紀與嵩岱華恆並祀稱
 五嶽蓋元淑之聚靈而荆楚之雄鎮也余弭節湖南嘗兩至祀
 神見其峰巒蟠鬱氣象偉麗竦然異之獨廟後數十步有橋有
 亭其下長溪泓泓實當山麓中流迤西朱明雖聳特其脈如斬
 心竊疑之夫南方文明奧區實鍾茲嶽迺使其脈鬱而不鬯豈
 巨靈之本質然與歲壬午大司徒凝齋劉公由節鎮兩粵被命
 召掌留臺過南嶽時震位尙虛天子方遣官祝釐名山維公心
 懸魏闕忠懷宗社一日貽不佞劄若曰衡嶽廟舊水道東北直
 遶廟前而西南以會於湘江自前代惑於讖文乃鑿廟後引水